



Najugaq qimannagu isumaginninnermi siunnersortitut ilinniarfimmik pilersitseqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut.

(Inatsisartuni ilaasortaq Peter Olsen, Inuit Ataqtigiit)

(Siullermeerneqarnera)

Qujanaq Inatsisartunut ilaasortamut Peter Olsenimut uuminnga siunnersuummut.

Qularutissaanngilaq, isumaginninnermik siunnersortinik amigaateqaratta, pitsaassangaluarporlu, aaqqiissummik nassaarsinnaasuugutta, qanoq ililluta isumaginninnermik siunnersortinik amerlanernik pissarsisinnaanersugut. Inissisimaneq maannakkut taamaatsillugu, aatsaat isumaginninnermik siunnersortinngorniarluni ilinniartoqarsinnaavoq maani Ilisimatusarfimmi, ukiumut 20-vit tiguneqarsinnaallutik. Taakku naammangillat maannakkut imaluunniit siunissami isumaginninnermi siunnersortinik pisariaqartitsinerup matussusernissaanut.

Taamaattumik atorfissaqartipparput, nutaamik eqqarsarnissaq. Uani najugaq qimannagu ataatsimik imaluunniit arlalinnik isumaginninnermi siunnersortinngorniarluni ilinniarnarit periarfissaassagaluarput pitsaasut. Pinngitsoorani Nuup avataani inoqarpoq, isumaginninnermi siunnersortinngorusukkaluartunik, assigiinngitsunilli peqquteqarlutik immaqa Nuummur noorusunngitsunik imaluunniit nuunnissaminut periarfissaqanngitsunik.

Najugaq qimannagu isumaginninnermi siunnersortinngorniarnep amerlanerit isumaginninnermi siunnersortitut ilinniarnissaat periarfississagaluarpa aammalu isumaginninnermut siunnersuinerup iluani sulinissamut. Ilinniagaq Ilisimatusarfimmi isumaginninnermut siunnersortitut ilinniarnermut attuumassuteqarlunnartariaqarpoq, taakku aamma ilinniutinik ungasianiillu ilinniartitsinermik ikiuussinnaammata.

Najugaq qimannagu isumaginninnermi siunnersortinngorniarnep arlalissuarnik iluaqutitaqarpoq ilaatigut inuusuttut Nuup saniatigut piffinni allani isumaginninnermi siunnersortitut ilinniarnissamik ajornannginnerusumik ingerlatsinissaannut aammalu ajornannginnerusumik atorfinnissamut, periarfissaqarsimassanngikkaluaramik taamaattoqanngippat. Aammattaaq inuiaqatigiinni isumaginninnermi siunnersortit naliinnerusumik agguataarneqarnerannik kinguneqassamat, piffinni allani Nuup avataani isumaginninnermi siunnersortitut ilinniarsimasut amerlissammata.

Isumaqqanngilagulli, siunnersuut naammattumik nassuiarneqartoq. Tamanna siunnersuuteqartup pisuussutiginnigilaq, tassami paasissutissanik pissarsiniarsimagaluarami. Demokraatiniilli ilinniakkamik aallartitserusunngilagut, sukumiisumik misissueqqaartoqarsimatinnagu. Isumaqqarpugut, aningaasatigut allaffissornikkullu kingunissai misissortariaqartut. Isumaqqarpugut, qulaajarneqassasoq, najugaq qimannagu ilinniarnep sumi inissinneassanersoq aama ataasiinnaassanersoq imaluunniit naleqqunnersoq kommunini tamani najugaq qimannagu isumaginninnermi siunnersortinngorniarnermik ilinniagaqartoqassanersoq?



Demokraatit isumaqarput, tamakku ersarissarneqassasut misissuinikkut paasissutissiinikkulluunniit.
Taassuma inernerit Inatsisartuni ersarissumik tunngavissaqartilissamatigut isummernissatsinnut.

Taamatut paasinnilluta siunnersuut Kultureqarnermut, Ilinniartitaanermit, Ilimatusarnermut aammalu
Ilageeqarnermut ataatsimiititaliami oqaluuserineqaqqittussatut innersuussutigaarput.